

公 約

公約者為族人公同議定之事書以成文而資信守者也蓋一事之創立必合眾力始能辦又必一致以維之始能久族事之興廢往往有待乎此者匪特當時信約此亦來後之法守也

凡子孫以祖先神主祔祠家廟者限以子午卯酉年冬至大祀典為期每神主一位取穀貳斗伍升以作行禮升祔之費如靳不出資私將神主巧置正龕者查出議處

寢室不得隨意開啟遇祭祀入主等事由總管謹啟之

族中会议必有重大事案始得在寢室前宣佈執行平時不得在此開會

每逢子午卯酉年舉行冬至大祀典凡族人無論老幼皆得入祠祀祖平時則僅由總管邀請族中六十以上之長者及贊禮者執事者入祠祀祖其餘族人概不參與惟求學或宦遊或經營工商業終年在外特歸祀祖者不在此例

凡與祭者衣冠須整齊行止須端肅違者由族長房長斥令出祠

贊禮執事職務由族長總管分派既定之後不得曠職

正祀後族長召集全族族人宣講家訓家規

冬至大祀典為會譜之期與祭者各須攜譜入祠至族長處報名

投號以防異姓混宗

族中年滿花甲與凡有衿榮者入祠與祭均不取費至應出費者毋庸議論

大祀典正祀之日凡族人入祠祀祖者無論收費與否概行至領票處取票證以備查驗

子午卯酉年大祀典遠族來祠祀祖之老幼每以雨雪嚴寒不堪其苦故改為農曆十月十五日舉行其餘冬至祀典仍舊

凡入祠祀祖者如欲寄宿祠內須自備被褥雖遠方族人亦必自帶行李

族長房長及各房長者於冬至前夕須將族事一一商議以今年之事件在此結束明年之計劃在此預定之

祠內總管由全族推選精明幹練不畏煩難者充之負出納租穀存款及承辦祭祀保管祭器與一切公物之全責

凡每年餘款除盡先添置田產外得由總管選擇存放如有損失須負責賠償至於利息多少則由總管及族人斟酌決定之

每年冬至祀典完畢之日總管須將帳目憑族核算每三年大結算一次請族人改選

祠內祀產新老契約佃字簿據并屯家碑文告示以及公物等項新舊總管交卸時應按照交代手續雙方接交清楚至余存錢穀尤應掃數交清不得拖欠

看守祠宇者由總管及經管選擇外姓老誠之人充當凡守護寢廟慎司香火灑掃房屋及收拾器皿照顧倉廩等事不得懈怠入祠時須嚴立契約繳納押金

祠宇房屋器具總管須隨時視察如有損壞或散失即時修葺檢點之

每年清明掃墓中元燒包以及文武聖人誕辰各祀典由總管及經管誠敬舉行族人均不參與

平時會議及其他事故召集族人餐食用費務須節省祭祀筵盛則宜從豐

各房私公如遇祀典欲借家廟舉行者須由其經管預先報請總管到祠監視祀畢後必將所用公物一一檢送原處請總管驗收不得遺失或拋置不顧違者議處